

Cumün da Zernez



Ledscha d'energia

080.100

LEDSCHA D'ENERGIA DAL CUMÜN DA ZERNEZ

Ordinà basand sülla ledscha chantunala d'energia. Approvà da la radunanza cumünala dals 30 avuost 2013.

Art. 1 Intent

Quista ledscha ha per mera la realisaziun dal plan d'aziun sviluppà i'l ram dal proget **ZERNEZ ENERGIA 2020** pel cumplet furnimaint dal cumün da Zernez cun energia our d'aigna producziun d'energia neutrala CO2 sco eir la promoziun generala d'ün adöver d'energia ecologic ed insistent sül territori dal cumün da Zernez.

Art. 2 Chomp da validità

Quista ledscha regla las activitats e las cumpetenzas dal cumün i'l ram da sia politica d'energia.

Art. 3 Disposiziuns d'execuziun, directivas

La suprastanza cumünala relascha las disposiziuns d'execuziun, chi fan dabsögn per realisar quista ledscha. Ella po relaschar directivas supplementaras.

Art. 4 Procuraziun da mezs

La realisaziun dal plan d'aziun e'l sustegn d'ulteriuras masüras degnas da promover dal man public sco eir da personas giuridicas e natüralas vegnan sustgnüdas our d'ün fondo. Il fondo as ramassa tras l'import annual dad 1.5 raps, per ura kilowatt transportada tenor il contadur da forza installà, pajats dals consüments da forz'electric sül territori dal cumün da Zernez. Las modalitats d'inchasch e da pajamaint vegnan fixadas da la suprastanza cumünala illas disposiziuns d'execuziun.

Ils mezs our dal fondo sun liats per quist intent e nu pon gnir dovrats per oters intents.

Art. 5 Adöver dals mezs

Il cumün promouva cun la taxa progets, chi survegnan üna taxa da promoziun, basand sülla ledscha chantunala d'energia (BEG) e l'uorden chantunal d'energia (BEV), sco eir ils cuosts da proget seguond dumonda KTI e da quels progets chi correspuondan als plans dad **ZERNEZ ENERGIA 2020**.

Art. 6 Calculaziun

La calculaziun dals imports per progets güstifichats as drizza tenor ils pussibels imports da promoziun dal chantun. Ils imports cumünals s'amuntan sün maximal 100% da l'import da promoziun chantunal.

Ils imports impromiss nu pon surpassar ils mezs i'l fondo.

Art. 7 Dret

Dret sün imports our dal fondo han be proprietarias e proprietari sül territori dal cumün da Zernez.

Art. 8 Dumondas da contribuziun

Dumondas da contribuziuns per progets güstifichats sun dad inoltrar al cumün culla documainta correspundenta avant sco iniziar culs lavurs. Proceder e fuorma da las dumondas da contribuziun vegnan regladas illas disposiziuns d'execuziun.

Cumainza ün proponent cul proget o fa el acquists, avant chi'd es i ad el il decret da contribuziun, lura nu vegnan concessas ingünas contribuziuns.

Art. 9 Pajamaints da contribuziuns

Eventualas contribuziuns vegnan pajadas be fin cha'ls mezs dal fondo sun trats a nüz dal tuot i'l on correspondent. Dumondas vegnan resguardadas tenor lur entrada.

Art. 10 Cuntravenziun

Cuntravenziuns cunter las prescripziuns da quista ledscha e cunter las disposiziuns d'execuziun sco eir l'alienaziun o l'obtenziun illegala da contribuziuns vegnan chastadas cun üna multa. Reguard il chasti, l'otezza da la multa sco eir il proceder vaglian las ordinaziuns illa ledscha chantunala davart la planisaziun dal territori, impustüt l'art. 95.

Art. 11 Controlla e surelavuraziun

Quista ledscha sco eir las disposiziuns d'execuziun vegnan a la fin dal proget **ZERNEZ ENERGIA 2020** la fin da l'on 2014 seguond ils resultats dal proget e cul plan d'acziun elavurà in quist connex, per la prüma vouta controlladas ed adattadas.

Davo segua üna controlla da la ledscha e da las disposiziuns d'execuziun almain mincha 10 ons, reguard actualità giuridica, finanziaria, tecnica e sociala.

Art. 12 Disposiziun transitoria

Dumondas per contribuziuns da promoziun, chi sun gnüdas inoltradas pro'l cumün daspö ils 01. october 2013, vegnan trattadas seguond la ledscha preschainta.

Art. 13 Entrada in vigur

Quista ledscha aintra in vigur cull'acceptaziun da la radunanza cumünala dals 30 avuost 2013.

Zernez, 1. october 2013

Cumün da Zernez

In nom da la radunanza cumünala

Il president cumünal



René Hohenegger



L'actuar cumünal



Corsin Scandella